

docriver 文川网
古籍书城
入驻商家
在文川网搜索古籍书籍 获取更多电子书

中國方志叢書·華中地方·第二九一號

據 清·張大煦修，歐陽澤闔纂
光緒元年刊本

影印


湖 南 省

寧遠縣志

(一)

5410/07

成文出版社有限公司印行



中國方志叢書·華中地方·第二九一號

據

清·張大煦修，歐陽澤闈纂
清光緒元年刊本

影印

湖南省

寧遠縣志

(二)

成文出版社有限公司印行

54.16/07



10097113

中華民國六十四年 月壹一版

寧遠縣志

全二冊

發行人：黃 成 助

出版者：成文出版社有限公司

台北市郵政信箱二二六〇五號
台北市羅斯福路三段二四〇巷五號

印刷者：成文出版社有限公司

內政部登記證內版台業字第一一四七號

docsriver 文川网
入驻商家 古籍书城

在文川网搜索古籍书城 获取更多电子书

爾雅釋詁

光緒建元
崇正書院校

甯遠縣志目錄

卷一 星野 沿革 形勢 鄉里 疆域

卷二 建置 城池 公廨 郵墟 搖崗 祠祀 寺觀 倉庫
橋亭 樓閣 坊表 堂附

卷三 賦役 戶口 屯餉 解支 耗羨 雜稅 倉穀 勸產

卷四 山川 名勝 題詠 古蹟 陵墓

卷五 學校 書院 鄉塾 學額 賓興

卷六 武備 紀事 駐防 兵制 校場 塘汛 民壯 弓兵
保甲 團防

卷七 人物 秩官 選舉 職官 封蔭 官達 名賢 忠義
孝友 貞孝 節烈 名宦 寓賢 儒林 隱逸
耆壽

卷八 風俗 方言 占驗 雜志附

目錄

志也者攷獻徵文信今傳後於以達之大府上之朝廷卽輶軒下
采遺意也方今鴻猷黼黻駿烈宣昭四海上永清之頌萬年建不
拔之基詞臣珥筆太史登書懿鑠乎軼唐虞而超秦漢矣余以同
治庚午來署是邑未三月以奉諱去他務未遑越癸酉夏復磨署
篆下車以來唯殷殷以剔弊釐奸正人心厚風俗爲要圖日進紳
耆接訪以資見聞所不逮旣又迭奉憲檄重脩邑志乃不禁慨然
曰斯志也扞於前任沈徐鍾曾諸公迄今多厯年所日月遷流未
免散佚矣而且廢興沿革烽火頻經補缺拾遺尤不容緩爰聘邑
紳歐陽石沔都轉力任其事余不揣譎陋互相攷訂閱六月而書
成且矢志之由來何代蔑有亦何邑蔑有而甯邑所繫則更有重
焉者稽其祥發春陵秀鍾濂水漢宋以來彪炳史策彰彰已況九
疑爲天下所豎稱蒼梧之野縣互入百餘里舜陵在焉過瀟湘而

弔英皇香蘭斑竹簇簇生新遷客騷人多會於此自李子元樂雪
磯兩狀元崛起累代科名不絕軍營旁午忠義奮興節婦貞媛指
難勝屈可不大書特書以顯微而闡幽哉獨惜近日風會亦稍不
古若矣鼠牙雀角漸卽澆漓余莅任三年頗勞籌畫幸習俗爲之
一變將見是書一出而星野重光山河煥彩龍驤虎拜蔚人材也
鼉振鯨鏗崇學校也魚占狼戾兆豐年也犬吠雞鳴增戶口也閭
閻靖蠻觸之爭科第集蟬貂之慶上以佐馨香之郵治下以暢芸
總之輿情是則守土者之厚望也夫光緒丙子知縣事弋陽張大

煦

舊序

甯遠之有志不自今日始也而甯遠志之當脩在今日則有不可得而緩者甯遠之志創脩於明廣文唐之儒

本朝以來前令沈公仁勇徐公旭旦鍾公人文皆重脩之唐志久失其本惟後三志尙存細閱各志詳爲參證別類分門體裁未能完整立言發議繁簡亦少合宜考據多疏勦襲殊甚非志之善也而其中所當更正者猶夥夫九疑瀟沅都谿天下名山水也載於水經注郡國志諸書不知援引指證使山川失色無以動人耳目當更正一也甯遠疆域廣袤三百餘里兼兩漢六朝春陵沅道二縣之地廢置沿革歷二千年諸史所載彰明較著不加深考詳爲條列使後人僅知有沅道不知有春陵當更正二也九疑爲大舜藏精之所春陵爲光武發祥之基神皋奧壤非他處比不能標顯

勝概闡揚事蹟使山靈地脈鬱而不宣當更正三也李子元樂雪
磯輩科名德誼冠絕一時爲邑翹楚傳中寥寥數語無以表揚先
哲振勵後賢當更正四也至於序天文則鈔襲省郡各志漫無翦
裁言地理則位次紊亂全少發揮事蹟多晦網羅未周當更正者
尤不一而足欲信今而傳後必易輟而改絃況自鍾志以後由乾
隆癸酉迄今五十餘年職官之代更戶口之增耗風俗之移易物
產之繁滋以及孝義節烈之閒生高賢碩彥之蔚起前者當補後
者宜增所貴及時采訪編入紀籍使後世數典者得所據依毋憂
遺缺更亟亟也不揣固陋爰遴延都人士與之辰夕商榷分類編
輯而竊總其成周六閱月而蕝事雖成書太速草率貽譏在所不
免然陶寫山水激揚節義揆求古蹟折衷舊章或損或增有因有
革脩辭選義考獻徵文一長一節可以勵風化者罔弗登焉一詠

一歌可以壯名勝者必爲錄焉一邑之乘煥然改觀不無小補則甯遠之有志雖不自今日始若覺自今日始矣嘉慶壬申知縣事閩南曾鉅

邑之有志國因之有史志何由昉乎自外史氏廢四方之志失其掌太史公易編年之法而作史記班孟堅作漢書復易史遷書體而爲志遂爲後來志乘之權輿於是而一統而省郡下而至於一邑靡不有志而邑志者又郡省一統志之權輿也乾隆庚午人文承乏茲土閱舊志殘缺失次大懼遺文放失罔識政要卽欲因地制宜以合人情宜土俗其道或無由且山川形勢險阻阨塞亦將茫乎莫辨又何以稱厥職守斯固甯志絕續之會而余早心焉念之矣旣又奉上憲檄飭脩輯時策仕之初簿書期會殊乏暇日越二年庶政漸理當道復不以余爲不肖而寬其督責爰郵書族兄

膺選來署屬以草創發凡舉例雖戶口田賦具載冊籍風土人情已悉梗槩而不但已也日進紳士耆老究心咨訪蒐輯遺聞退食之暇相與參互考訂每至夜分不休迺舉舊志之殘缺者補之失次者序之又爲之去其太繁增所未備固不敢挂一而漏萬尤不敢附會以傳疑博稽詳核列卷一十有四期年而書始成亦良艱矣夫所貴乎志者以紀其實而傳之後世垂於無窮有善之實而不知爲不智知而不言爲不仁不仁不智則其所志皆無關於重輕者也或則因陋就簡其失則略或則誇多務廣其失則支於徵實何有焉孔子曰我欲載之空言不如見之行事之深切著明誠重乎其實也江淹有言作史之難無出於志一邑之志莫非徵文考獻之資是卽憲章之所繫固未可易爲矣惟是邑有故實而不爲之紀述有司之過也況甯之爲邑周元公系由於此而李樂諸

君子又後先輩出是固文獻之邦也自徐君脩志後距今僅四十餘年已難免其殘缺今又置之後此更當何如且此數十年間人物事蹟日出而不窮者又將聽其散佚已乎予所爲述故事續往冊抑聊輯見聞以備遺亡耳至於斟酌盡善揚摧風雅以登古昔作者之堂則以俟後之君子乾隆癸酉長至江右與國鍾人文蓋自九邱先於六籍地象倣於河圖故則壤成賦而後爲職方爲輿圖爲統志代有成書非徒鋪張揚厲潤色治平已也凡以幅員之廣狹關隘之阨塞戶口之多寡賢仁之出處物產之滋植名山大川之襟帶按圖索賁莫不於是乎在故志者志其所未備也今天下大一統矣東至日出西被流沙南盡交趾北窮沙漠基宇之闊車書玉帛之盛誠亙古所未有行開史局延遷固手筆重輯天下輿志成一代盛典則翰軒四出勢必求諸郡國郡國又必求諸

邑蓋天下者一邑之所積也故一邑之志未備則一郡闕如一郡
闕如則在通省在天下猶然未備也故吾謂他邑有志而甯邑獨
無志非無志也誠未備耳嘗慨然曰甯邑廣袤三百餘里倣之周
制當在侯伯之列賜履不爲不廣矣人物如李邵樂雷發輩洵彬
彬有道君子後豈無繼起者且俗尙絃歌風土旣稱樸茂則孝義
節烈之事堪人載者豈寥寥若彼卽九疑一區實爲天下靈府千
秋弔古之士如蔡中郎元漫麥者盤桓寄嘯作爲篇章爲邑乘光
采彼陽諫議寇萊公豈直擁肩輿作默遊而去然卒不可復識元
明以來又無論矣我國家蕩蕩平平之盛治固已一道德而同風
俗回憶兵燹之餘去今幾四十載其間戶口之增耗若何土地之
開闢若何政治之興革風俗之改易若何人物之崛起山林物產
之繁育若何反復全志不無闕焉未備之憾雖然猶幸前事者從

殘編斷蠹之中存什一於千百俾後人得一變之味假使聽其播
棄於灰燼故紙閒則其增感又復何如耶於是亟爲之序四十載
以前之事雖不敢謝諸已往四十載以內不惜爲之旁搜博采引
爲己任凡我父老者舊有聞必書有見必錄有來告者必校讐而
剗刪之務使顯微巨細條貫犁然甯質毋華甯樸毋野甯信而有
徵毋夸而鮮據錄之成書以備千百年九疆信史庶他日輪軒之
采不至失而求之野云康熙己丑錢塘徐旭旦

歲癸亥之春

天子以滇黔告平四方底定爰命儒臣纂脩一統志以昭盛典志
成功也越夏仲郡檄至縣甯荒邑也戎馬蹂躪之餘典籍久經零
落延唐舊本訪諸人士蕩然無一存者秋仲之辰復奉嚴檄下邑
謀諸邑之紳士某某等諸君子相對錯愕罔知所措乃懇勸賞之

docsriver 文川网
入驻商家 古籍书城

在文川网搜索古籍书城 获取更多电子书

格以開鼓進之門又閱旬日而始獲田子殘編於樂生之家雖列卷有六率皆顛倒失次散佚不全於是卽其端緒加以潤色田賦則質諸昭代之全書祀典則參以學宮之令甲山川土俗按輿考而敘述得宜物類方名詢閭閻而織悉咸紀至若古聖名賢之遺蹤高人烈士之芳躅以及義夫節婦孝子順孫各從其類校而列之俱各燦如指掌嗟呼甯之爲甯自兵燹殘破以來文獻無徵上下相沿罔顧名義者不啻數十年於茲矣今幸志書一出法制未湮將盡取歷代之往蹟表揚而稱道之其閒貞淫各別妍媸攸分或者愚夫愚婦觀文物之存聞風興起莫不憬然於觀刑則儆之餘則重輯之功其所裨於世道人心者正自不淺云康熙丙子甯遠令大興沈仁敷

甯遠縣志卷第一

星野 沿革 形勢 鄉里 疆域

保章星野實判堪輿零郡躔軫甯迺一隅繁稱博引非蕪則誣

統諸疆域畫井分區志星野

翼軫楚之分野今之零陵皆楚分 摘西漢志

軫四星中一星名長沙亦曰玉衡 東漢志

斗玉衡第四星主荆州專以五卯日候之己卯日為零陵 張衡東漢志注

自張十七度至軫十一度為鶉尾于辰在己楚之分野零陵入軫

十一度 晉天文志

五車楚主司空五車五星在畢東北司空其中星也主楚司空星

明其地歲豐 宋史天文志

諸史所謂長沙指軫垣中一小星也長沙因此名郡零陵入軫

十一虞指古零陵一郡言也攷世紀二千九百三十二里爲一
虞甯邑幾何豈足以概之然而長沙星明至長壽司空星明占
年豐其占實亦在甯境矣

沿革

唐虞

自帝舜南巡後甯遠爲過化之鄉至今縣南九疑山虞陵在焉托
始於此著聖蹟非考建設也

三代

甯遠屬荊州春秋戰國時爲楚南境

秦

始皇二十四年滅楚置長沙郡以漢封舂陵地考之今之甯遠隸

長沙郡

漢

武帝元朔五年封長沙王子買爲春陵侯其地今在甯遠西鄉城址尙存後析置春陽復改春陵治皆在此未建國以前爲春陵鄉屬長郡至元鼎六年析長沙置零陵郡領縣十其一洽道卽今甯遠也

按漢書春陵建國後一十三年始立洽道縣屬零陵春陵時爲侯國不隸於郡至初元四年考侯內徙其地省入洽道故後漢郡國志洽道下注云有春陵鄉又城陽恭王傳云封長沙王子買於洽道之春陵鄉知春陵并入洽道也三國時吳分其地爲春陽洽道二縣故晉書於零陵下注云吳置春陽立縣應始於吳或曰宋書春陵洽道二縣隸營陽太守於春陵令曰前漢舊縣侯徙國南陽省吳復立疑西京時已立縣是又不然考前後

漢地理郡國二志止有冷道並無春陵如果已立縣史豈無明文耶是春陵立爲縣自吳始晉因之宋復名曰春陵所言前漢舊縣者考水經注云都谿水出春陵縣本冷道縣之春陵鄉漢長沙定王分以爲縣武帝時卽其地封其子買爲侯疑分封時自立非朝廷所建置可見漢時春陵並未立縣也然春陵冷道分置改併舊志都未詳考蓋未建國以前冷道併於春陵旣內漢以後春陵入於冷道吳時分爲二晉至梁陳皆因之隋省二縣併入營道蕭銑時析營道以二縣之地爲梁興縣唐改曰唐興由唐迄明雖縣名屢易甯遠疆域實兼漢時一國一縣之地爰依世次詳註之後之鑿者庶免混淆云

三國

先是魏武敗於赤壁南郡以南屬吳昭烈分荊州以湘水爲界屬

蜀後主時復入於吳及吳主皓分零陵南爲始安北爲邵陽零陵統縣十一冷道之外又置春陽卽漢分春陵故地當日雖分二縣皆今日之甯遠及新田地也

按晉書地理志零陵郡下注吳置是分今之甯遠爲冷道春陽二縣自吳已然晉特仍其舊耳舊志不察於零陵郡統縣十一下止有冷道乃又指春陵分封爲晉代事謂侯建國於縣改名春陵大誤

晉

初因吳舊屬零陵郡穆帝時析零陵置營陽太守領縣四春陵冷道仍分二縣改屬營陽卽今蓬州

按晉書地理志零陵郡吳置統縣十一而晉時因吳舊春陽冷道二縣屬零陵又按宋書州郡志營陽太守江左分零陵立領

縣四是東晉時改名春陵與冷道並屬營陽也但於春陵令曰前漢舊縣春陵侯徙國南陽省吳復立屬零陵冷道令曰漢舊縣屬零陵繹史文疑今之甯遠前漢時已置春陵冷道二縣故以前後二書及水經注證之說已見前舊志言魏晉改爲春陵並不知甯遠之地分爲春陵冷道二縣也

宋

因於晉爲春陵冷道二縣屬營陽郡詳宋書州郡志已見前齊

屬營陽郡與晉宋同見南齊書州郡志

梁

無州郡地理志可考惟查隋志零陵郡永陽條下注舊曰營陽梁置永陽郡平陳郡廢則東晉所置營陽太守至蕭梁時改爲永

陽郡治道春陵二縣屬焉

陳

無志可考隋志太業初永陽郡省復隸零陵郡領縣五其一營道
下注平陳併治道春陵二縣入焉陳因於梁並無析置知二縣
仍屬永陽郡

舊志於晉後總曰六朝注宋梁陳復改治道不知何據似晉宋
以來各書志全未查考合晉與隋爲六朝業已先後分列總目
已謬注又不及齊支離可笑玩復改治道句蓋由沿晉改春陵
之誤終以當日之二縣爲一縣也

隋

廢永陽郡爲縣復置零陵郡領縣五併入營道由漢以來皆二縣
至此始合爲營道一縣屬零陵郡隋末蕭銑稱梁析置梁興

舊志注洽道併入營道屬永州按隋志先置零陵郡旋併祁陽
永昌應陽三縣地置永州總管府改泉陵爲零陵隸焉營道縣
或先隸零陵郡後屬永州總管府詳查湖南通志並府縣各志
俱無明文存以俟考舊志但注洽道併入不及春陵注屬永州
又不及總管府不知永州在唐爲州在宋元爲路至明洪武初
始改路爲州也

唐

武德四年析永州地爲南營州梁興改名唐興隸焉

貞觀中改營州爲道州唐興隸道州

長壽二年改名武盛隸道州

神龍元年復名唐興隸道州

天寶元年置道州爲江華郡改唐興名延唐隸江華郡

大厯二年析延唐西北地置大厯縣自此爲延唐大厯二縣皆隸江華郡

舊志於武德初改唐興隸營州後止詳縣名之改復並未查貞觀以來營州改道州旋又改江華郡雖係州郡之改置與屬縣無涉亦應隨改注明歸於統轄如舊志云云終唐之世甯遠皆隸營州甚疏

五代


梁開平中改延唐爲延昌屬江華郡

唐同光初復名延唐屬江華郡

晉天福中又改延唐爲延熹屬江華郡

漢因於晉屬江華郡

周因於漢屬江華郡



五代史出梁訖漢湖南地爲馬氏所據凡十州年表皆載入楚馬氏國號也至周受漢禪後湖南十州又屬周行逢亦見年表首尾共五十餘年兩姓竊據署置自如朝廷但羈縻之而已舊志惟注梁唐晉三朝改復縣名之處不及漢周所統之州郡亦不載或馬或周先後紛擾雖使甯遠之人今亦不能辨別也

宋

初仍延熹屬江華郡

乾德三年置道州江華郡始改延熹名甯遠省大厯入焉於是二縣又併爲一縣屬道州江華郡甯遠之名始於此

元

改道州江華郡爲道州路甯遠屬道州路

至正二十二年兵亂土民李文卿率眾拒守

明

初改道州路爲府洪武二年平章楊璟克永州李文卿歸附遂因舊名立縣隸道州府

洪武九年改道州府爲州永州已改路爲府甯遠始屬永州府

崇禎二年衡州司馬張恂以甯賦倍地遠請割縣南北二鄉一十三里另置新田縣在縣東北境同屬永州府自此又分二縣至今不改

國朝

順治四年恭順王孔有德入永州因明舊名立縣屬永州府

一邑雖小比古諸侯建設以來或分或併或置或廢其先後異同之處人民之所由託政治之所由敷酌古準今則沿革當考也甯屬楚南境舊志所載自三皇以訖帝舜莫不臚列夷考當

docsriver 文川网
入驻商家 古籍书城

在文川网搜索古籍书城 获取更多电子书

曰楚地雖內屬然凡楚荆州者皆同不足以備甯掌故惟帝舜南巡嘗登九疑實在甯道厥後堯期倦勤崩於蒼梧之野葬於九疑之山至今首列祀典高皇帝以此爲甯之托始亦明書斷自唐虞之義夏承有虞荆及衡陽爲荆州甯在荆州之域殷因於夏周因於殷皆無可述者至秦新天下爲郡縣建長沙郡甯地隸焉於何徵之徵於漢之長沙定平國南有春陵縣故以爲邑後其中子買封春陵侯卽建國於此其地在今甯道之西鄉遺址尙存又按水經注營水條下曰故城者卽節侯之春陵故邑也曰新縣者乃蜀漢時孫吳所置春陽縣故又有東西相對各方百步之語於是知甯遠自前漢時先設春陵爲邑後乃立冷道縣已判然二矣特春陵爲王私邑非冷道比故前後漢書止有冷道無春陵由漢以來合觀諸史參互考證覺二千

餘年之久沿革瞭如指掌蓋自春陵內徙并於泠道至吳置春陽泠道而後東晉仍之春陽改爲春陵齊宋因之隸營陽梁陳因之隸永陽泠道春陵無不各自爲縣隋併二縣地入營道始爲營道一縣僅三十餘年唐又析爲延唐大厯三縣宋省大厯入延唐改爲今之甯遠越明崇禎又析南北鄉地置新田縣至今仍之約而計之併而爲一者自漢初元鼎四年終於三國分而爲二者自吳孫皓鳳凰元年迄陳末年省而不置縣者自隋開皇九年至大業十三年復設爲一縣者自蕭銑僭號後至唐大厯時復分爲二縣者自唐大厯至宋乾德時自宋乾德四年迄明崇禎十二年又併爲一自崇禎十二年以逮於今仍析爲二矣前志於厯朝之分併廢置都未詳考今於厯代之下詳註之復總而論之使後之考者得所據依焉